

HISTORIA DI BRENCHE ARENDS & B.J ARENDS & SONS N.V.

ORANJESTAD (AAN): Relaciona cu nan aniversario, den fin di siman e prestigioso empresa B.J. Arends & Sons a haci varios donacion na instancianan caritativo, manera SAMBA, Ambiente Feliz, FADA/PRIDE, Casa Cuna, Cas pa Juventud, y Fundacion Pa Nos Muchanan.

Ta casi imposibel skirbi historia di B.J.Arends & Sons sin bay den historia di Bruno J.Arends (miho conoci como Brenchie) den feliz memoria.

Brenchie Arends su vida comercial a cuminsa na aña 1921 na edad di 47 (dos aña despues su mama-Susana Maria Quant tambe a fayece jong na edad di 47) y cu e tabata studiando na Corsow pa maestro di school. Siendo practicamente yiu mayor, pasobra su ruman mayor Jacobo Arends tabata trahando na Maracaibo, Venezuela. E mester a bandona su estudio y bolbe Aruba pa cuida su rumannan mas jong, di cual tin dos na bida ainda, esta sra-viuda Margo Wever-Arends y Fortunata Arends-Arends (miho conoci como Fortunata casa di Milo Arends).

Na 1921 Bibi Arends (omo di Brenchie) (tata di difuntonan Dr.Eloy Arends, Tan Arends, Machi Arends, Wa Arends, Rika Arends y ainda na bida Ika Arends, Nene Arends, Tida Arends y Mario F. Arends) a yuda Brenchie Arends habri un tienda chikito na e cas shinishi di dos trapi cu despues a haya e nomber di El Castillo, y cu a worde tumbá y cu ta keda dilanti di Warda di Polis actual. E tabata un tienda masha simpel cu tabata bende entre otro casca di laraha cual tabata worde bendi cu Corsow pa traha licor y tambe tabata bende pan lefi y mas cos dushi (cu e rumannan y tantanan mes tabata traha). Tambe tabata bende cashipete cual tabata worde recoge di mata di cashu y lagá na solo pa seca. Alimento provision tabata bin di Corsow.

Den e decada di 30 a traha e edificio na Wilhelminastraat 57 y eynan a cuminsa e tienda di provision cu a hiba e nomber di San Nicolas Store y esaki a keda activo te den añanan 50 cu e a worde bendi cu Mario F. Arends (Arends Agencies)

Na 1934 a habri Aruba Hardware Store cu ayudo despues na aña 1936 di difunto Pedro Damian Wever (miho conoci como Janyo) kende a traha mas cu 40 aña den servicio di BJA & Sons te di dia cu el a bay cu pensioen.

Prome di september 1950 a



habri un sucursal di hardware na San Nicolas y e cera atrobe na aña 1954 y djey na 1965 a bolbe habri San Nicolas Hardware bao di gerencia di e director Bruno (Tico) Arends kende a bandona Lago pa join Aruba Hardware C.V., sr.Josy Franken (Warehouse mgr.) a worde emplea na San Nicolas september 1950 na edad di 13 aña y ganando Afls.90.00 pa luna.

Na 1973 a habri Brenchie's O'stad Home Center cual tabata tin un impacto substancial ariba e mercado di houseware y na 1977 a habri un sucursal di Home Center na Dakota Shopping Paradise cual a worde cera na 1980. E negoshi a bira B.J.Arends & Sons e aña aki tambe.

Na 1980 a habri San Nicolas Brenchie's Home Center.

Na 1982 a habri Brenchie's Dakota Lumber Yard y despues a bira Lumber & Building Materials Center ora cu e a muda na 1993 pa su adres actual di Rondweg 121.

Por ultimo a habri Brenchie's Annex na 1989 na Wilhelminastraat 74 (Antes Winkel Handel Mij.) pa alivia e espacio pretá di O'stad Hardware y Home Center.

B.J.Arends & Sons N.V. ta e nomber legal desde 1977, pero como cu e ta negoshinan semper a worde yamá "Brenchie" a dicidi di usa e nomber ey comercialmente y como ta mas cu un tienda a dicidi pa usa Brenchie's Hardware Center, Home Center, Annex y Build-

ing Materials Center.

Brenchie's ta un di e prome negoshi cu a cuminsa sponsor team di littl league bao di nomber di E.O.Stanley Tools y American Standard y te awe e tin un team den Little y Senior league. Tambe bao nomber di Brenchie's e ta sponsor un team hubenil di futbol via RCA, y team di volleyball.

Pa loke ta e parti social y caritativo B.J.Arends & Sons semper a yuda tur cu a bati na su porta y na 1984 tempo cu e a cumpli 50 aña a sorprende Brenchie Arends, den feliz memoria, cu fundacion Brenchie Arends cual fundacion te awor aki a haci donacion di mas cu Afls.150.000.= den nos comunidad.

E ultimo aki no sa worde anuncia pasobra a dicidi di sigui e filosofia di Brenchie Arends cu "No tur cos cu man drechi haci e man robez mester sa".

B.J.Arends & Sons ta debe su exito di 60 aña di existencia cu 6 verkooppunt y 125 empleado full time cu e miho beneficianan comercial y social cu tin ariba mercado usando e filosofia cual ta oficialmente poni den un guia di empleado esta cu:

(1) Pa suministra un calidad halto di producto y servivio na nos clientenan na e prijsnan husto.

(2) Pa duna nos empleadonan e seguridad di ta trahando pa un empresa exitoso cu satisfaccion di empleo, bon pago y bon condicion di trabao, reconociendo nan derecho di worde

informa y consulta ariba tur asuntunan cu ta afecta nan trabao.

(3) Pa gana suficiente placa despues di paga belasting pa suministra un pago di dividendo adecuado na nos accionistanan cu a confia nos cu nan placa, despues di a re-inverti suficiente capital den e negoshi pa mantene e valor di nan inversion y asegura un crecemento sano y duradero.

(4) Pa mancha nos empresa cu e atencion debido pa e medio ambiente y pa interes di e consumidor y e publico en general.

Last but not least nos ta mancha e empresa aki cu tres director esta Tico Arends desde 1965, Donny Arends desde 1959, y Ebby Arends desde 1963. E managerman ta

Josy Franken (Warehouse manager/O'stad) desde 1950; Vella Arends (Office Manager) desde 1962; Yolanda Olivierre (Store Manager/San Nicolas) desde 1972; Samuel Kelly (Purchasing Manager) desde 1968; Frank Lobbrecht (General Manager/Dakota) desde 1987.

Pa loke ta plannan pa futuro ta nos intencion di expande y moderniza nos negoshi, pues ta keda up to date pa asina nos por drenta siglo 21 sin problema.

Por ultimo mester enfatisa cu e inversion principal tabata e empleadonan y esaki lo no por tabata posible sin nan apoyo y bon trabao. Nan ta e rikesa principal di B.J.Arends & Sons N.V.